


回風堂詩文集

PL  
2708  
.E6  
v.4









Digitized by the Internet Archive  
in 2010 with funding from  
York University Libraries



JUL 03 2001

## 回風堂詩卷三



慈谿馮拜君木

慰章叔言乙卯

章生意氣橫高空落落穆穆何其窮  
胸次一尺太古雪照徹世界生  
寒風滬濱兒女紛青紅顏色黯淡苦不同  
寄生無地暫託足儵若大海飄秋蓬  
高歌彈鋏聊一放可憐眼底皆蟬蟲  
長松終受紅鶴穢白壁那避青蠅蒙  
年年坐爲口腹累亦欲發憤難爲雄  
平生窮餓出天性摹回挹憲真能工  
守玄寂莫良有以不須上怪天無聰  
君看十萬花如錦可在冰天雪窖中

調汲蒙

汲公老逃空枯槁兀自廢消搖方之外春糧宿蕭寺歸  
來塊獨處足跡不入內白晝經房闌往往遭犬吠小樓  
支虛空簾戶紛掩蔽泥壚折腳鐺一室帶茗氣燒炭作  
嫩紅照面生美麗顏唐坐遣日挂眼無餘事寥寥僅指  
十起居資俠侍亦有小求索咄嗟呼兒至非干齋宿禁  
不涉河魁忌胡爲老尹邢鼂夕以面避蕭然處家室形  
影孑無儷當心月不爛苦覓小星替終當置燕玉煖老  
關至計那得娥媯兒宛宛映盼睵小心結纏繚妥帖到  
夢寐朝雲久飄散誰復可人意方寸有不甘怨思出微



喟樓外山亭亭髣髴見眉黛時於無人處送此可憐態  
幻想百歧錯惱亂極腸胃高邱豈無女蓄願良有遂可  
惜好老公于思太無賴端須伐口毛妍笑博幼艾

雜興

篝燈在壁油半乾以書就燈摩眼看餘光耿耿照肺肝  
燈火欲死神彌完三更四更城鼓殘吾伊兀坐忘夜闌  
明朝白日下屋山主人枕書猶高眠

餅梅淖約弄晚妍圍燈取影明鏡前燈痕鏡光相折旋  
青紅碧綠徹眼鮮若霞之飛晶晶然渲以一抹銅爐煙  
曲室中有清微天華嚴彈指嘻無邊



平生入世百不工中年所得徒能窮心思智涸文采童  
但有病骨撐虛空吾眼不瞽耳不聾胡爲尺寸鄙厥蹤  
卻疾苦無山芎藭黃泉槁壤吾其蟲

過叔申故居

牖戶掩蕭瑟苔色上虛幌心神乍一提似聽呻吟響登  
堂步欲卻刺眼見君像依然舊眉額嘿對增愴恍幼子  
坐讀書口齒能清朗見我亦知悲咽淚梗喉吭小小白  
衣冠欒欒就羈鞅可念玉雪兒嫖妍失跳盪努力制深  
哀辟咷加曲獎顧言猶在耳宿諾吾敢爽願以方寸心  
耿耿照幽壤誠憂仔肩重瘦竹難獨杖回皇念疇昔欲

哭不能放

答佛矢卽效其體

已分哀時淚眼枯猖狂歌哭到窮途文章大歷真才子  
意氣高陽古酒徒避世俄悲生意盡論交彌覺物情孤  
玄文寂莫疇能與且向黃壚覓狗屠

再贈佛矢

君是泱泱大國風我還一氣轉清空馬枚下筆分遲速  
毛鄭稱詩有異同三舍晉重原不避偏師秦系亦能攻  
爭名角利都無暇應被時流笑二蟲

示玄嬰



咄咄陳無已神鋒苦太適狂呼卿且去恆覺我爲優容  
物宜高致關心到俗流要招空際月相與作清秋

空游一首貽玄嬰

世累不足溷蕭寥到意度肯以虛靈心與物爲喜怒嗒  
然倚槁木空游無所住我見百解脫方寸有懸悟湛湛  
玉明天本來無垢汙行雲任飄瞥何處著微忤

夏日簡洪左湖曰湄

端居廓落感孤吟暑氣侵人旋旋深那得清風穿地脇  
坐看白日爛天心微刪草樹通涼思密合簾櫳取嫩陰  
苦念可人洪玉父露初星晚肯相尋



七月五日胸痛幾殆病間有作

奇苦真應裂肺脾終朝何止謁三醫命垂俄頃偏難絕  
死亦尋常但恨遲暫託哀呻蘇氣息祇將淚眼對親知  
吾生未受天刑酷今日猶深痛定思

胸腹患作兩月未瘳賦詩自遣

犖确肝腸鬱不平縣縣病苦逼殘生胸盤芒碭龍虵氣  
腹有瞿塘水石聲不信怪奇成痼癖可堪塊壘作彭亨  
此中空洞原無物渣滓如何累太清

道署白衣寺夜被肱篋幾盡惟書籍狼藉草地中  
棄而勿取叔申遺稿在焉收拾感歎賦詩示天嬰

僧房一夕遭偷兒物物皆已不翼飛惟有詩人詩纍纍  
狼藉草地棄如遺窮人之具竟無用咀嚼不得療朝飢  
先生有才但覆瓿寡人好貨難居奇拉雜敝苓了不顧  
而我寶若珣玕琪寒瓊幽草驚拾得冥冥若有靈護持  
單本幸脫墮溷劫不亡一髮吁其危欲付殺青苦無力  
把卷涕落紛漣漣任教語言到聖處流傳沒世猶須貲  
後死故人吾與汝程嬰杵臼疇當爲

編定叔申遺詩僅得七十篇爲一卷題詩其後

一逝人間跡已陳零篇大句積紛綸知君別有關心處  
非我都無著手人刊落才華歸蘊藉平亭風格得清新

鳳毛挂眼何愁少地下應能照苦辛

玄嬰幼子建斗蹴鞠爲戲鞠落水斗躍入撩取迨  
出泥水淋漓滿其身玄嬰撻之余戲以一詩解之

斗老能蹴鞠

蘇子由生第四孫  
斗老東坡有詩

爛漫自天發滑如丸脫

手疾若弩離筈蹋地一失足隨波去漂漈頰拾不可得

心愛那忍割追逋比奮迅拯溺同急切見鞠不見水竦  
身赴清闊渾忘性命重寧顧頂踵滅蹙破鏡中天捉到  
水底月大索窮九淵須臾擎之出泥濘堆肩項萍藻牽  
毛髮塊然土偶人無眼耳鼻舌素衣化爲緇玉貌蒙不  
潔真成黑曰廬遑恤白乎涅而翁怒其頑筈撻致深罰



國風堂詩卷三  
勸翁且勿怒試以一言聒爾我風波民人海苦冒突無  
能援以手誰復加諸膝濁流第靡中真性久汨沒回頭  
念兒戲夢境墮飄忽斗也富天趣童心正蓬勃春風發  
苕穎茁壯不得遏洿塗蹙顛隕俄頃旋自拔呼湯三伐  
洗肌膚仍玉雪急難勇能赴計較漫不屑小過宜在宥  
矧足覘風骨斗乎爾勛旃持之永無失

示陳生建雷

雷也苦心役典墳積書之高可隱人曼哦急誦窮朝昏  
顧影汲汲如追奔羣經諸子百家言參以左國馬范班  
左右堆疊成亂山十指如風葉葉繙鐺略阮錄部次繁

紛綸不暇竟委端四大海水流渾渾頃刻欲以一口吞  
吞之不得涎塞咽寸茹尺吐心熬煎吁嗟雷乎姑自寬  
一息那能籀其全讀書譬若登山然蹠積踵累無回旋  
縱歷千困百險艱有日終造崑崙巔不然東陟西復攀  
心氣促迫行不前恨身無翼不得騫石頭路滑徒虞顛  
兩眼空挂青巔屹雖魁父耳猶升天吁嗟雷乎汝勉旃  
虎父之子無犬豚觥觥才性天所根珠明玉暖丁妙年  
博儲歲月資探研要憑心力破積堅無患不達患不專  
未之能行惟恐聞彼襜襜者勇無倫斯言汝盍書諸紳

病中作

秋氣入心腑，颯沓無靜理。中虛得暴下，一夕十數起。炎火燔其膚，毛髮焦欲燬。顛倒極胃腸，楚毒徧支體。奪我窮性命，此角彼復掎。七尺能幾何，百病集如矢。何辜於彼蒼，幽囚到床第。殺之良亦快，法又不至死。天刑受具足，桎梏幾時解。煩冤達九閭，咄咄天無耳。

贈陳次農

康黼

憔悴江潭照苦吟，夕陽家國感悵悵。杜陵老去猶看鏡，單父歸來欲碎琴。疾病久淹爲吏日，窮愁誰識著書心。憂生念亂情何限，那不相逢涕滿襟。

次韻佛矢



冷抱幽憂臥薜蘿繁霜身世各蹉跎衣冠海內清流盡  
啼笑人前咽淚多不忍傷心問耆舊且須刮耳聽謳歌  
九天大有翔嬉處獨奈冥冥退羽何

蒼茫八表感同昏時事驚心復動魂脈脈呻吟裘氏地  
堂堂歌哭子桑門大難身世嫌形贅小劫人天祇舌存  
願拂衣塵求止泊共參達磨的兒孫

### 紀事

秦川公子最蕭閒飛蓋西園日往還千載流芳兒輩在  
叢談待著鐵圍山

宋雕元槩聚紛綸巧篡豪搜足苦辛不惜美官酬劇蹟

伯陽今日亦佳人

次子貞用生十九月知識字口不能言以手指之  
字之便於上口者亦能發音焉已識得四五十  
錯易顛倒歷試弗爽亦可謂小時了了矣賦詩紀  
之

人生識字憂患始爾獨何爲又蹈之直取形聲資語笑  
聊憑指點作娛嬉聰明宿世寧應昧事業他年已可知  
絕肖而翁生了了看來原不是佳兒

無題

金堂脈脈思無端鏡裏容光祇自翰豈有同聲歌宛轉



苦將細步學邯鄲香車擲果稱都念  
粉檻排華祝合懽  
燕詈鶯譟渾莫問獨愁春事易闌珊

金珠綵繚發明光儀態真能盈萬方  
玉貌漸愁消慘綠  
佳期無奈誤昏黃笑顰暗妒東家子  
窈窕生憐西曲娘  
會得矜嚴無語意不妨顛倒寫妃央

迢迢清夜洞房徂百轉回腸太鬱紆  
夢裏紛紅兼駭綠  
眼中看碧忽成朱小家碧玉能攀貴  
絕代羅敷自有夫  
一夕汝南偷嫁去可還山上憶蘼蕪

日出東南照路衢明妝猶記故人姝  
瓊瓏畫楫歌迎汝  
宛變紅牙拍念奴芳訊難憑潮下上  
舊歡空憶夢須臾

雄龍雌鳳紛填咽那有閒情聽鷓鴣

左招瓊姊右蘭姨衆婢連娟蹀座時鈔飾金釭居合德  
自題團扇媚芳姿三挑忍負抽觴意十索俄成蹋臂詞  
不是蹇脩通眼語丹心的的有誰知

停辛佇苦總關情歷歷星辰昨夜明誰遣千金繩鄭袖  
似聞一笑惑陽城頰顏暫作投梭拒白首終寒割臂盟  
從此東西溝水斷更無人唱麗人行

北方絕世擅佳名叩叩香囊賦定情可但胡天又胡帝  
果然傾國復傾城蟾蠍淚盡銅龍滴嬰鵬魂驚鐵馬聲  
玉碎珠噉成決絕悔將密約負平生



大道朱樓百尺高  
璫簫金琯咽嗷嘈  
乍看弄玉升天去  
忽報常儀入月逃  
玳瑁雙珠灰縹眇  
茗華小印字堅牢  
上清秘錄分明憶  
自燕都梁續諾皋

舊蓄明成化窖水  
注一先君遺物也  
自先君棄養隨余  
幾三十年嚴寒不  
戒忽爲冰裂且惜  
且悲賦詩紀之

摩挲手澤倍纏綿  
响沫相濡況有年  
忍比孟生捐墮甌  
真成子敬惜青氎  
堅冰不戒心同裂  
碎玉難期瓦與全  
卅載孤兒留缺憾  
可憐無術補終天

回風堂詩卷二



回風堂詩卷四

慈谿馮弁君木

壽張蹇叟六十丙辰

眼中一老信堂堂人海歸來髮漸蒼  
自掬肝腸照寥廓每將談笑出悲涼  
龍蛇歲月猶堪翫玉雪兒孫已作行  
天遣清流存野史勞君扶杖看滄桑  
拾隊鉤沈意可唏寥寥副墨有光輝  
中州耆舊資元裕吳地山川記廣微  
耳目聰彊都不廢文章天矯亦能飛  
千春天福從渠享可但陳芳說古稀

送虞含章輝祖

世變寧有涯流浪徒自累支眼看治亂那復關吾輩池  
亭明好春風香澹空際朋尊坐超忽擘契到人外虞卿  
老能癡苦辛役文字積誠窺微茫往往通其意深言互  
送難直道暎肝肺執持有不同寂寞差得慰胡爲浪自  
苦逝與風波會落手好光景蕭索成割牽滬壖盛才俊  
飛揚各予智喧天誇政略無地容汝喙汝去何所挾毋  
乃疏作計誰實驅遣汝念之發嗟喟區區文酒樂所望  
亦匪泰久聚詎敢必謂可畢年歲浮塵倏漂散微願苦  
不遂纏緜夙昔意俄頃付憔悴昭昭白日中曠感在氣  
類努力養神明取足通夢寐



夢中作

倚袂萬山頂天風生睫眉酒悲峯氣突詩思月來遲石  
冷雲荒地霜清木落時迴腸閒料理寸寸作離奇

感懷

惛惛人事足悲哀蔽日浮雲黯不開但覺蒼天非俊物  
坐看濁世盡奇才蚺蛟磯下江聲咽鸚鵡洲前草色灰  
畫地狂言誰復省千秋此意付塵埃

何甘荼其樞自奉天寓書言客中人心變幻使人  
不敢不匿其真性情而以假面目相見其言絕痛  
賦一詩寄慰之

苦隨羣碎逐腥羶俗物何堪與作緣  
掬此肺肝方寸地  
匿之簾幙十重天  
委蛇客況成虛幻  
真摯家山隔眇緜  
他日光明有回復  
歸來驗取酒尊前

題含章文稿

一往窮孤詣惟求心所安  
無人照辛苦絕代見高寒  
澹色能無著疏絃亦罷彈  
深深空外意持此與誰看  
初稿云不見虞卿久時時苦念之爲文有我在用意少人知片累能無著恆言亦可思餘芬滿懷袖惓悵欲詒誰

喜句羽自鄂至

惘惘經年別相逢倍眼明  
眉橫楚天色詩有漢江聲  
閱世增蕭瑟論文覺老成  
吾心久無著爲汝發深情



於人家屋後得荒原距所居不百許武水樹竊曲  
可以徘徊

閑閑意思與無窮咫尺荒原落手中積水彌天帶江色  
殘陽點葉作秋紅提攜煙景資幽討歛息塵勞入遠空  
百匝相尋都不厭獨來人外看西風

次韻張蹇叟見貽放宋本陵陽倚松二集蓋嘉興  
沈乙庵所刊者沈有序自署老民其紀年猶曰宣  
統癸丑也丁巳

慶元一髮存單本天壤寥寥獨識真撥棄煙埃追冷澹  
琬鍤寒碧出嶙峋稱詩苦愛西江派開卷如逢汝社人

割取巾箱肯相餉知君用意亦能仁

以仿宋本韓子蒼饒德操二集贈君木題詩其

端

張美翊

江西詩派當時盛宋本傳摹未失真一代韓饒同寂寞中天坡谷並嶙峋遺編甫出悲亡國法脈相傳見古人持贈知音倍珍重漫將訾議薄居仁

題京伶梅蘭芳瘞花小象

蹙蹙蘭幄兼蕙歎茫茫雨橫更風斜名都風景餘秋色亂世人才比落花荷鍤相從紛涕淚褰裳俄惜竭菁華佳人別有纏綿意不爲芳春發怨嗟



寒夜追憶叔申

三更四更天雨霜忍寒不寐行繞廊疏星耿耿鬼眼碧  
殘月淒淒人面黃積取傷心成幻想坐收清景與迴腸  
漂魂斷夢渾無據那得風吹到汝旁

題徐仲可珂純飛館填詞圖

微吟慙遣有涯生四海彌天蚤擅名無限江關蕭瑟意  
自彈爪甲作秋聲

殘笛蘆洲老弁陽偷聲減字入微茫江南歌吹夢騰裏  
祇是無人解斷腸

朱鬯父景彝爲其先公研臣先生大勛寫樂山草

堂圖并合先生遺墨爲一冊屬題

紅羊一炬曾樓毀樂山草堂拔地起五十年來幾翻覆  
主人魂魄歸蒿里主人雖逝堂則存闌檻出沒胥山雲  
莓苔如帶履綦跡花木猶留手爪痕主人有子亦儒素  
寫作畫圖寄哀慕白雲惆悵見親舍指點當年讀書處  
何況主人書家尤落筆往往凌虞歐煙光墨色迴超忽  
照映邱壑生清秋風流宛變若眼神理繇繇接圖卷  
孤兒用意絕可矜皆淚爲君應一泫

復題研臣先生墨蹟

昔者我先子常以畫自怡託興到指肘往往窮深微平



生長作客飄泊不得歸  
手迹所流轉遠在天之涯  
秋風吹片羽不向家山飛  
至今索粉本零落靡孑遺  
憶升年六七時看調鉛脂  
身短不及几跂足旁相窺  
先子顧而笑汝幼何所知  
捉筆寫數紙畀之作娛嬉  
一僧籠手立其前垂蛛絲  
一隻跨驢背梅花風雪靡  
亦有甲冑士英武浮須眉  
是豈岳武穆將非郭子儀  
瑣瑣在心目歷歷徒悲思  
寂寂書策外不復睹光輝  
刺眼見是卷完好無缺虧  
老成有容色展卷卽得之  
書道與畫理寄象恆於斯  
念君寶手澤觸我無窮哀  
掩卷發嗟喟淚落紛漣洏  
屬疾數月佛矢有詩見念  
賦此爲報

端居積病更誰憐  
片紙無因到眼前  
宛變歌詩俱可口  
蕭疏筆札亦能天  
窮途孤賞留吾子  
隔世歡悰憶少年  
賸取呻吟相爾汝  
要憑心力返華顛

爲楊季眉顯瑞題舊藏崔問琴鶴所畫李香君小象

仿佛琵琶罷唱時  
媚香樓外柳如絲  
卷中人面渾依舊  
不道崔郎是畫師

黔陽詞客已黃沙  
畫扇飄零付夢華  
認得君家舊明月  
分明月底有桃花

久病幾殆范君文甫賡治之不十日而大差賦

示文甫

鄙夫多口干天怒天欲殺之君勿許力出指爪相舐距  
何物彼蒼敢余侮嗟余入世百無補獨以悲哀役心腑  
半生高閣徒溷人一死長埋亦快舉小范老子老好事  
不使生人爲鬼虜手招魂魄返自厓我欲空游迷處所  
念君活我意良苦可惜人間非吾土浮生勞勞不得息  
德邪怨邪奈何汝

文父治余疾意甚摯當疾亟時日自十里外臨視  
其高義可感也酬之不受強以梅赧翁墨蹟贈之  
並媵以詩



國風宣詩卷四  
尊生妙發明堂秘問疾來參丈室禪窈窕心靈回小劫  
蒼茫肝膽映秋天交期懇懇憑誰證性命區區仗汝賢  
割愛相酬同脫劍此情須抵白金千

丁巳十月甬上紀事

官奴城頭唬老狐城中白日兵塞途橫刀蹋地紛詔呼  
行子不敢鼓隴胡纂嚴令下羽書急叱咤旌旗齊變色  
將軍設備何整暇城北城南斷消息居人一夕臥數驚  
但聞徹旦兵車聲車聲杳杳鼓聲死步騎如潮退不止  
江岸颯沓西風號敵軍未到將軍逃將軍欲逃將軍怒  
誓以背城作孤注十萬黃金供饋賂明日將軍橫海去

小住寥陽館示貞伯

輕煙消盡鵲爐香  
落色虛庭賸夕陽  
小竹疏花清在眼  
安排他日作思量

兵甲聲中靜掩扉  
那能煮石慰朝饑  
期君覓取無人地  
十畝荒煙種蕨薇

春日養疴保黎醫院聞錢君紉靈經湘家有海棠  
二樹余乞其一遣人迎致先之以詩戊午

抱病空齋日閉關  
蕭蕭華髮對風鬟  
不愁婦女無顏色  
奪得燕支一朵山  
時內子亦從在院

姊妹花開色最嬌  
一株特遣慰清寥  
勝他小院風煙裏

銅雀春深鎖二喬

海棠旣至乃知紉靈家止此一樹前詩爲失實矣  
再賦三絕兼調紉靈

一枝分與作溫存幸有餘芳伴酒尊今日花奴迎接汝  
誰知桃葉卽桃根

未必有詞酬白石真成無賴盜紅綃畫闌幾尺陰陰地  
卻與何人共寂寥

咫尺紅閨入夢思要憑顏色慰調飢狂夫應被佳人惱  
不得從郎索口脂

種海棠於醫院賦詩紀之



淡雲微雨晝悵悵恰稱栽花一片心手掬香泥勤護惜  
綠章不用乞春陰

灌溉端資造化功精誠耿耿徹皇穹病夫倘緩須臾死  
他日來看一丈紅

與海棠相對幾及三月臨行悵悵賦詩志別

感別情懷一往深他時應有夢來尋風欺雨橫須禁得  
莫負籠燈照汝心

王龜山德馨六十索詩

甘從餓死得高歌終古才人老輶軻崦嵫日落浮雲暮  
兀兀將奈龜山何

冰署頭銜比廣文每因祭徹博微醺祠官割肉成常例  
儘許東方饋細君

水深泥濁公無渡絮亂絲繁我欲眠岢嶲神州褐之父  
端須束手送流年

日日歌斯復哭斯坐消壽命亦奚爲君看遍地桓宣武  
祇許王敦作可兒

煮石空山可樂飢不須裹飯證心期琴歌歲晏相啍濡  
那有脣乾口燥時濡如戍反

題錢逸琴經藩山中校莊圖

宋槧明琬集衆芳南華微旨賴張皇蕭蕭掃盡千秋葉

絕代功臣世德堂

所校爲世德堂本異  
文隊簡多所誤正

詩老題詩興不孤十年宿諾祇須臾畫中山色渾依舊

可惜先生一字無

圖留陸鎮亭師所  
十餘年今始得之

中年舊學待商量江海飄零願未償猶有家山如畏壘  
憑誰尸祝到庚桑

### 聽歌贈李生

李生年少真英絕餘事音聲亦可人絕憶後來鈕非石  
彌天文采壓伶倫

悲涼節拍動三河合使尊前喚奈何絲竹中年都束閣  
猶能痛哭和長歌



初秋自西鄉歸輿中口占

衆山掩映夕陽紅輿轎蒼茫入畫中一路稻香吹不斷  
坐消三十里秋風

含章爲余作詩序屬其族子自勛提學銘新書之  
以贈自勛曾以詩卷自山西抵余至是賦一詩報  
之兼示含章

薄宦虞卿舊識名近來筆札極孤清胸吞臬落浮雲色  
詩帶汾河斷雁聲癡叔君家情獨至佳人臣里目初成  
文心墨妙真雙絕慙媿寒郊作浪鳴

哭陳次農同年

滇海歸來事日非空山歲晏惜芳菲  
交游已恨晨星少魂魄俄隨落葉飛  
衰世明玄端得困餘生行遯不成肥  
寥寥涕淚無流處灑與窮泉作累欵

廿年追逐比雲龍豈料幽明路阻封  
袖底芳香留芷若夢中城郭隔芙蓉  
文章憎命誰能贖蒼昊讎才苦不容  
毒手老拳行及我九原車笠倘相逢

次農之喪諸交舊會哭薛樓三年前恆與次農游  
讌於此感舊傷逝不能無詩

高館朋尊久寂寥鷄鳴風雨感膠膠  
賦詩曾此陪吳質爲位誰知哭孟郊  
慘綠牆垣飄薜荔凝塵闌楯見蠨蛸

九天咳唾銷沈盡那得遺文付別鈔

壽關太翁八十

太翁爲吾師來青先生父早歲官河南工畫山水兼精刻印

中歲從軍矢苦辛遂初賦罷卽抽身誰知策馬橫戈手  
祇作眠雲跂石人宦况中州題別集閒情藝海寫珠塵  
板輿苜蓿餘真味長許頭銜署老民

長公師事幾經年曾向蘇門拜老泉語笑清尊迴白日  
行吟拄杖倚青天鐫華石墨勤猶昔點筆林巒晚更妍  
欲爲黃眉添故實彌襟供養到雲煙

贈錢太希罕

悵悵高致故難量寂處生涯有樂康天茁韭菰充鼎俎



人紉荷芰作衣裳深微且可窮孤詣衰歇何心問衆芳  
吾事寧愁霜雪落埃看畏壘祝庚桑

歲暮與陳天嬰張于相原煒蔡君墨集江上樓感  
舊有作

來日寧知事大難匆匆光景暫偷安春盤嫩火消佳夕  
小雪深燈映薄寒意緒將愁增婉篤生涯與夢比闌珊  
煙羸花瘦渾無奈且向人天拾隊歡

回風堂詩卷四

回風堂詩卷五

慈谿馮升君木

新歲雪中車行己未

淦淦流雲弄嫩晴單車犯冷入空明  
彌天積雪浮郊色夾轂層冰帶石聲  
納手袖籠留薄暖支頤牕洞得餘清  
春城簫鼓渾多熨絕物翻爲莽蒼行

贈圓公

昔者鄭都官喜以僧入詩道詩無僧字  
其詩格必卑斯言妙天下實解詩人頤  
自我識圓公歲月俄推移人寰一握手  
發我無涯思圓公有古德寧獨詩是期  
雖不與



詩期而詩亦宜之寺門看山色青青浮脩眉贈子以不  
語子知我爲誰

次韻寥陽春日感懷

忽忽吾生迫老蒼端須作達遣春光排空花有曉霞赤  
照面酒如初月黃突兀看天成獨醉徘徊顧影惜殘陽  
由來虛謚妨行樂邱貉何煩判聖狂

原作

姚壽祁

節物催人亦大忙虛庭縱眼惜流光疏藤緣樹迴新  
綠細草含花作嫩黃逝景匆匆成短夢芳情宛宛委  
春陽中年意緒傷哀樂潦倒清尊不解狂

坐牕一月不成教兀兀孤禪且自逃窈窕明簾飄夢  
雨闌珊小苑落春桃柳梢煙斂鶯聲縱草背風微蜨  
翅高亦有飛鳴無盡意獨揮殘淚寫蕭騷

題桃源避秦圖

咸陽一炬大地童桃花猶作秦時紅寸田尺宅在縹眇  
消息不與人間通神山只尺風引去欲往從之途路窮  
歷漢魏晉汔今世千歲萬月春濛濛今世何世多裸蟲  
開鑿幽險班鳧叢毒涎荒莽腥連空縱極南北橫西東  
桃源有地不可避徑欲將身入畫中

哀家辛存宜銘

我昔年十六歸自松江濱卜居抱珠山恰與君家隣君  
家好門風羣從多彬彬師事子魏子課學何辛勤我時  
齒雖稚亦廁弟子倫展席西牕下吾伊哦詩文每時先  
生出雜遝開酒尊拇戰訇四坐儼然張一軍伯子好整  
暇出手見淵源叔子語更吃期期口沫噴君也稱健者  
爪甲揮清塵每戰輒逐北其聲能奪人語言相嘲謔裳  
衣任倒顛薈騰但作豪寧關人世艱此樂猶昨日吾曹  
非青春少壯有光景一逝不可攀伯兮復叔兮奄忽歸  
重泉家世況不幸摧折到後昆盛衰信靡常言之傷心  
魂自我之識子時序幾推遷眼看天上月三百六十圓



念子真辛苦努力支清門漂搖風雨際意量猶淵醇我  
已將始滿子過知非年冀以卅載交寂莫慰歲寒崦嵫  
薄日色一棺俄戢身并此不余畀忍哉蒼蒼天昨者過  
君家紙灰飛庭前虛堂睹遺象恍惚平生歡寥寥書室  
外牡丹方含芳花落有開日君去安當還哀哀藐諸孤  
麻衣何纒纒執手不能語出門走逡巡回頭望屋角夕  
陽淒無言作詩雪悲感一字聲三吞

于相屬題其姬人孫姑小象時于相又將挈姑赴

杭州

一幃春風上玉顏亭亭燕寢伴蕭閒隔江眉黛青如畫

可似張郎筆底山

嫵妍意色見辛勤猶有餘塵點鬢紋一舸相隨渾不定  
本來佳婿是浮雲

曩集少溫三墳記得風止十字秋日坐濠上樓彷彿遇之足成一律示于相

湛湛看江水迢迢意與長迴心收曠邈挾眼入微茫風止散林碧沙明含石光高樓檐相對天末已斜陽

季則五十生日感賦

庚申

草草緣何短依依夢不真半生終負汝十載尙爲人漸覺成衰老誰能慰苦辛風軒遺挂在滴淚作生辰

挽何倦翁

應劉已逝又徐陳  
鬼錄俄驚故易新  
別後清尊成隔世  
眼中白髮失佳人  
追惟大睨高談日  
遂了幽憂善病身  
地下女嬃勞久待  
祇應雪涕說盧綸

訪貞伯

衝風蹋到城東路  
敗柳荒蘆盡颯然  
祇有籬根霜菜色  
青青猶解媚殘年

陸鎮亭師廷黻生日招飲病不克與賦詩報謝

辛酉

歲晏心期暫合併  
酒尊閒寫到平生  
二三弟子共頭白  
九十老人猶眼明  
短髮陽阿晞落日  
悲歌汶社起秋聲



城西煙水渾如昨恨不相隨寂莫行

次韻佛矢

塌翼逢衰世雕蟲老壯夫肯隨蘭芷變一任馬牛呼愁  
甚天將壓思深海亦枯知君趺坐處繞膝長黃蘆

挽陸鎮亭師

文星耿餘耀火龍齧其系炎風更恣虐煜煜忽墮地酷  
暑金石流衰耄況堪耐明日蓮花生今日先生逝先生  
今碩師懷抱極淵邃輶車走隴右列郡著名字中歲謝  
朝簪誓墓作歸計緬懷止足分肥遁終不悔城西得古  
坊結屋聊自蔽昔傳許丁卯今稱陸乙未

先生所居精  
曰乙未坊精

廬闢二三陶淑到後輩大義闡經典餘事及文藝辛勤  
二十年歐心出教誨孤芳所孕育播植萬蘭蕙世變俄  
颯沓宗風遂飄墜何所無芳艸往往化蕭艾烟塵莽六  
合無術理荒蕨扶杖看人海予立發深慨蠅聲聒里耳  
何地可置喙矧方以就園不忍爲此態中情誰復察博  
簪取天忌坐令好言語謔出付鬼祟提攜畢生恨旁皇  
在寤寐蒼蒼不可問彌留有長喟并也方弱年稍稍發  
藻采脫口落葉詞獨結函丈契相從漸白首文字關氣  
類咄嗟匠石死此事恐終廢汙謬鎮亭山草木彫光氣  
寧直哭其私亦雪哀時涕

童次布第德求爲其父銘墓以雙龍硯見贈賦詩

答之

隱君名德尙依稀知我寧愁後世希  
片石微茫端可語九原寥落與誰歸  
恨無佳傳酬都穆恰有深情比杜沂  
千古瀧岡追孝思筆頭應挾兩龍飛

題玄嬰松菊猶存圖

旅泊年年足苦辛聊憑圖畫寄閑身  
分明滿面風塵色不是松邊菊下人

燕燕謠三章

班書外戚傳錄成帝末京師童謠音節僞急見



當時民生迫蹙之象輒仿爲之用刺今之爲政者時辛酉歲暮

燕燕尾涎涎張公子時相見蜷項伏羽年復年張星四照飛連天張星明燕翼輕張星落燕折足

燕燕尾涎涎老徐娘情纏繇鵲笑鳩舞君高遷寵之阿閣凋梁前一人寵燕化鳳一路哭燕變鵬

燕燕尾涎涎扶桑島長留連島上桑椹紅徹天飛來飛去東海邊海日黑燕飛急朝啄人暮啄國

題美人伏虎圖 壬戌

主父胡服昵孟姚熒熒顏色思陵茗重瞳拔山氣蓋世

一曲虞兮發悲涕英雄自古多有情纏絲歌泣關精誠  
叱咤羣雌逞意氣餘子鹿鹿皆荒傖君看山君何其武  
不向佳人肆哮怒形同土偶須任料狀似伏敵腦可鹽  
吁嗟爾虎真堂堂繞指能柔百鍊鋼妍皮豔骨供咀嚼  
世間惟有中山狼

哭錢仲濟

舉世多罔生獨清政奚爲斯人不五十憤憤關天意平  
生堅牢性寧受世牽制壽命不我與俄隨日月逝君懷  
康時略博謇見風槩抱直作議民借箸期小試重承父  
老屬力欲挽凋敝民生寄喉舌艱阻有不避衆稚徒溷

人但取申申詈朝三復暮四無隙容吾喙掉頭歸東海  
恥爲旅進退歸來學鑄人磬索徹表裏委心付桐子發  
願端非細井井學生屋根本出至計晨滋九畹蘭夕樹  
百晦蕙衆芳日峻茂端憂稍用慰維君開美度妙備四  
時氣豈無能言流當之輒自廢檠檠歷物才目光出牛  
背方寸所蘊蓄欲測故不易識子垂卅年幸與結幽契  
未見吾不知所見實無對咄嗟國之寶墜地作粉碎道  
路有悼泣密邇況吾輩追惟庚申冬疾疢倏爲厲失血  
如沈泉口鼻紛決潰醫言非佳朕食新恐不再要須脊  
調攝庶或延年歲君聞無奈何閉戶屏人事端居學坐



忘努力養其內亦知生有涯萬一作希冀冉冉逾一年  
奄奄終無濟病亟吾走省忍痛撫牀次張目但視我淚  
涸不盈皆恆幹得大捨一日遂放臂坐令瑰瑋腹薶沒  
入九地生才良獨難拔之乃復擠誰實執其咎胡能不  
天懟鄉閭失此士緩急將焉賴吾黨失此士承學絕津  
逮予生獨後死跼地成孤寄但有婉孌心相尋到夢寐  
徘徊展遺象自顧覺形贅已矣國無人奚止傷氣類

夜至湖上

廿年不踏湖頭月一夕來看陌上花宛孌回腸傷老大  
曹騰彈指惜芳華清歌子夜應無悶春水吾生共有涯

皴面臨流誰省識酒紅聊復向人誇

與李霞城

鏡第

趙芝室家

蓀

陳玄嬰葉叔眉秉良

胡君誨

良箴

何秋茶家仲肩

堪

王幼度程之會飲

湖上西泠印社林亭水石布置絕勝賦詩紀之

五步林亭十步樓真堪衽席作敖游蟬嫣佳境心能造  
離合山光目與謀彈指空中思往日題名石上賀茲邱  
習池會飲都非偶潦倒清尊惜白頭

游靈峰登來鶴亭山僧出陸小石探梅畫卷見視

中多咸豐諸老題字感賦二絕

紅羊歷劫莽煙塵放眼不見前朝春光宣少年今白髮

何況咸豐卷裏人

一上孤亭百感生江山如此厭言兵  
寥天日暮鵲啼急不是堯年老鶴聲

湖上書所見

藻績岳王廟漆雕蘇小墳湖山渲金碧  
無地著夕曛挂眼雷峯塔黯澹薤荊榛  
會須裝七寶鏃鏃爲鮮新

別家坎民

坎民吾宗雋卓犖出人表丁沽海山色攬  
奇入懷抱一官淪下邑負此身手好南流  
匯北派緣法自天巧君每聞吾至喜心輒  
翻倒折簡致賓友治具恣醉飽深談忘



爾汝默對窮昏曉纏繇非世故此意人不瞭平生治兵  
學所志不在小恥以保障才爲人作牙爪鞅鞅多不屑  
坐干肉食惱逝將舍茲去何所無芳艸繫余伏山澤心  
地久枯槁薺得吾子相識恨不早眼中好光景愴怳  
不自保飄風吹落葉蹤跡忽如掃歷歷兩載來別緒苦  
繳繞合併倘有期惜哉吾獨老

題明建文牙牌拓本爲趙叔孺時櫚

面文云朝參官員懸帶此牌無牌者依律論罪  
借者及借與者罪同出京不用背文云戶部四  
川司主事右側文云建文元年給方孝友左側

文云文字貳百拾玖號字皆陰文

北風北來白日微金川門牡忽以飛  
囍囍出出付一炬  
銅符銀檠嗟無遺飄零法物出天壤  
建文殘跡存依稀  
孤臣給事此傳信劫火雖烈名不灰  
內廷肅禁嚴出入  
奈有燕子飛來時族誅蔓抄革除盡  
是物獨賴神護持  
君從何處得拓本申紙發我無涯悲  
聚寶神血結方寸  
赫蹏鬱鬱生光輝嗚呼胡廣解縉真  
癡兒委蛇章綬空  
爾爲姓名終供狐貉噉告身覆瓿無  
人知

沙母周孺人壽詩

清清東錢湖淵淵無涸時  
溫溫沙氏母鬱鬱志不弛  
母

氏出自周而於沙乎歸重親得逮事內外咸稱宜勤勞  
相夫子于田力不遺晝爾治漿饁宵爾理麻絲欲以手  
指臂力振家之微家微不可振所天忽云頽哀哀未亡  
人屬望惟孤兒孤兒生多病三十神已衰終棄阿嬈去  
命短嗟何其生人罹此毒摧撞那可支母曰天亡我我  
何自亡爲孤桐縱勿殖猶有新孫枝彼茁者五枝苕穎  
紛葳蕤心血作雨露日夕濡沃之冢孫今方冠立行能  
不欺爲文道貞苦樸屬無枝詞諸孫雖童幼頭角亦鬢  
鬢半生躬百悴食報恆於斯福固未可量壽已臻耄期  
君看東錢湖浩蕩流無涯



贈沙孟海

文若卽送其赴上海

吾生老好事愛才若瓊寶豈謂廣培植亦用娛懷抱若  
也獯者徒幼清能愛好從游六七年畢景恣蒐討餘事  
工刻石法古非意造刃游碧落外指節出怪巧盲風弔  
大地陵遲及雅道區區抱微尙寂寞無人曉英才天所  
篤努力造深窈含睇佇山阿得子吾可老

芳物餘幾何日受風氣剝涓涓一滴清不抵萬流濁眼  
中諸年少好我惟子獨拾唾作珠璣妥帖歸掌錄蕭蕭  
烟水外寂寂兩間屋深言互證羣往往窮昏夙飢來不  
可忍遠游圖自鬻離別苦累人政坐有口腹幽憂多疾

疲恃子慰蕭槭惘然促之去作計將毋酷男兒志四方  
行矣毋蜷局迴光照衰朽夢來倘不速

贈俞亢葛暘

列坐二三子清言送夕陽頗能哀寂寞肯與寫芬芳得  
句酬俞亢工書契葛暘餘生資慰薦定欲老何鄉

答李審言

詳

勝流清尚漸闌珊天末夷猶感影單夢寐招要疇識路  
詩篇慰薦勝加餐中年日月爲歡暫末世文章適性難  
千里呻吟幸相接不愁口燥與唇乾

憶犬詩

吾昔官枯州畜犬曰剛毅置身百僚下狎侮到權貴薰  
天勢正張白晝役魑魅同官私戒我口舌毋貽戾豈不  
畏官方積憤難自制矢口作呵叱聊復取快意大河流  
佳訊聞喜忽道斃回頭顧小犬花下方沈睡剛毅

東隣有義犬矮脚毛色黝主人貧失飼見我輒張口晝  
於我乎食夕歸爲主守我家招不來主人驅不走耿耿  
報主心肯爲肉食誘豫讓爾何人對之色應忸來富

黑兒何綏綏媚人輒以尾背人上牀臥蹤跡祕如鬼主  
婦怒其頑屢笞屢不止被放江之麋汝實自取罪黑兒  
阿黃墮地時嗚嗚啼不止吾兒抱以來大裁及狸子嫌



其毛色庸斥去贈隣里豈意項領成雄佼乃無比保家  
過健僕觸邪等獬廌見我似怏怏呼之但搖尾取才乃  
以貌噫嘻吾過矣

阿黃

自我居甬水寂寥寡儔侶千錢聘黑奴朝夕相爾汝蹙  
口但微嗾百帀作飛舞奴星忽飄散抑鬱誰與語黑奴  
窮居苦荒落誰與守環堵自我得黃耳則莫敢余侮夜  
半偷入室狺狺以口禦三至三見逐卒用固吾圉主人  
嘉其勞食必賜之脯得食亦知拜拱立類禮鼠一節惜  
不終致身復他許豢養非勿豐竟謂他人主南北走胡  
越朝莫易秦楚士也貳其行嗚呼奈何汝

黃耳

吉利有慧根喜與文字暱潛身字簾中自營作巢窟或  
薦以裯憑旋薦旋被拍蜷伏故紙堆鼾聲呼呼發書城  
得保障安隱及故物憐渠通人性與語輒能悉依戀肘  
腋下不忍加呵叱何來沙吒利萬方誘之出懸金布零  
丁蹤跡終飄忽鍾情到物類排遣苦無術令令若在耳  
忽忽如有失吉利

自吾移家甬上與葛氏姊爲隣葛甥暘相依問學  
幾十年所壬戌九月徙而他適感舊惻愴不能無  
詞會張蹇叟有詩贈暘遂次其韻兼呈吾姊

喜汝駸駸耆古深每攜佳本輒相尋比隣密邇通聲息

到戶分明辨足音意氣舅甥真酷似衰遲姊弟況同心  
根株孑立憑誰芘惜取枌榆十丈陰

中年骨肉意彌敦十載因依恰對門婉篤微嘘回暖氣  
蕭疏斷夢挂風痕連棲莫復資情話卜宅端宜長子孫  
稍喜新居猶不遠會須三日一相存

蹇叟餉黃巖橘報之以詩

風塵遠致色猶鮮話到分甘意惘然別有酸辛縈齒頰  
且將悲感答纏綿民生莫保侯千戶樹蕝虛期木十年  
羣盜連山方物損可堪回首赤城顛

五十生日書感



百年過半百無成夢醒虛堂骨亦驚歲月如蒸五斗米  
聲名止及一牛鳴老來懷抱餘秋氣亂後詩篇有過聲  
進德知非都不暇從容食粟了浮生

爲李雲書部郎題其母張太夫人船燈照海圖

暝色如磐不可行疏燈一點照熒熒蒼茫海上生明月  
的皪天邊見大星遂使高空開夜氣要將先路導心靈  
瞿唐艷預休愁絕十丈豪光破杳冥

渡海訪李審言至則先一日歸揚州矣疊前韻寄之

斬此人間一握歡徘徊歧路感闌單發言未許酬孤賞

敗意真當廢夕餐  
百里東西相望久  
四方上下逐君難  
全河勾我猶虞渴  
何況如今后土乾

次韻贈王幼度

歲計崢嶸不可論  
天寒地凍此黃昏  
整齊怨亂歸詩卷  
追攝心魂賴酒尊  
宛宛燈光消短夜  
潭潭茶味得清言  
高歌餓死尋常事  
相約桑輿共閉門

庾衍得兒時故硯題之

片石同甌脫  
童心耗此中  
賸餘鸚鵡眼  
灼灼看衰翁

回風堂詩卷五



回風堂詩卷六

慈谿馮并君木

新歲得幼度除夕書疊韻寄答并問徐句羽近狀

癸亥

隔歲書還見淚痕依然八表感同昏老來奇服疇余好  
溺後儒冠祇自尊幸有徒歌充寂聽每從孤憤證微言  
南州孺子應无恙試叩林間窺窬門

寄章叔言再疊前韻

增華改葉有寒溫神思從知醒亦昏城北衣冠誰比美  
淮南賓客自言尊文書堆眼消佳日詩句排愁託罪言

一夕蘧廬聊作適不妨蓬戶視朱門

示兒子貞胥

頃見貞胥有一絕云非無貽玖投瓊意終被風  
吹雨打回顛倒裳衣空復爾從知入世要奇才  
憐其意次韻廣之

男兒入世憑心力要與艱難戰一回脆骨媚膚徒姁姁  
飢寒能忍是奇才

題梁虞思美碧玉造象題名記拓本爲陳介閣

其文曰中大通二年歲次庚戌四月八日吳興  
人虞思美敬崇釋迦像一區上爲皇帝陛下國

祚永固邊方安泰水災了絕民生休寧又願一  
切受苦衆生咸同斯福都六十字造象已佚厘  
存斯記書體峻整茂美足以羽翼始興外韜木  
匣匣上有趙悲盦題字曰天地間有數文字旁  
款云梁玉象題名舊藏江甯甘氏撫叔趙之謙  
其玉今爲趙叔孺所藏叔孺用石綠拓其文並  
刻二印鈐之拓本一白文曰天地間有數文字  
一朱文曰辛酉十二月四明趙叔孺得梁玉象  
題名記矜寵至矣陳介闇得其一本屬題

峻嚴妙躡賈思伯緜密遠開蘇孝慈片玉蕭梁餘劇蹟



不須重問館壇碑

趙三瑯刻美無倫抱得貞珉慰苦辛  
宛孌斯文如女色不妨碧玉當情人

幽翠寒瓊拾得難平分手拓與人  
看臺城柳色應无恙留取青青照歲寒

贈傅宜耘

一心戴蒼天兩腳蹋實地雖曰未嘗學語言有真氣少  
小通輕俠斥弛負俗累老來痛自責坦白了不諱皈身  
到淨土非敢求加被挂口阿彌陀夢寐得安慰眼中諸  
孤兒孤根失蔭庇誓以幼幼心拔之出荒蕨盈室贅棗

施終期化荃蕙赤手掬衆咍努力資一漑迢迢新加坡  
行行一而再羣稚所託命九死吾寧悔大哉褐寬博仁  
勇無二致耿耿方寸內熱血老猶沸荆山有璞玉純白  
徹表裏對君每自疚讀書但作僞

壽趙七家蓀

有儒一生美丈夫鬢鬢白晢微有鬢兄弟八人德不孤  
君也自昔頭角殊高談劇論聲響麤意氣直欲吞江湖  
排解紛難忘爾吾莊嚴物望籠鄉閭大官好爲竭澤漁  
小民生計彫不蘇脂車急走杭之都冀以口舌相啗濡  
鄙夫摸犢還偷驢掉頭歸去羞與徒嘿嘿不復鼓嚨胡

招要賓客羅尊觚雜沓縱酒爲嬉娛醉鄉可老吾其逋  
左顧孺人右弄雛一家歡樂真良圖行空天馬白日徂  
五十之年猶須臾有酒不飲寧非愚賦詩聊復申區區

壽李徵五

老友李君今健者意量坦坦無所假生日徵言有恆例  
不願人諛願人罵書生罵人擅長技辭鋒所抵吁可怕  
試擊禰衡鼓三通用酬杜蕢酒一壘李君家世稱高貲  
卅載揮斥靡孑遺有錢不爲子孫守上天下地窮敖嬉  
平生感槩發宏願一手欲拔千瘡痍眼中世路多險巇  
誓以心力填平之平原結客徒豪舉魯連排難空權奇



聲名驚坐復何益陳遵原涉皆癡兒君不見東家鄙夫  
百不預銀錢塞戶無人顧西家富兒刻骨吝坐積黃金  
鑄棺櫬君獨何爲漫不貲傾家爲俠忘其私四十九年  
無是處破喉一罵君應知

朱贊父鼎煦自甬寄秋蟲數頭至賦詩報之

到手函初發泠然作小鳴因風得佳訊隔海寄秋聲枕  
簟涼微轉窗櫳雨易成草蟲念君子惘惘不勝情

雨中坐明存閣遲友不來

蕭蕭樹頭葉帶著秋雨飛窮巷寂無人有約來何時憑  
虛望寥廓車聲聞依稀車來不我卽謂是而更非晚煙

冉冉合漏出街燈輝恨此黯淡色不照君容徽徘徊以  
相思嗒焉掩牕幃

爲徐朗西題寒雅荒塚畫幀

嬋娟三尺桃鬟紅嬌鶯稚燕聲在空美人含睇花玲瓏  
黏天帖地皆春風桃花一夕變枯樹下有深深薶玉處  
鶯邪燕邪渺何許但聽老鴉作鬼語

題秦潤卿祖澤僧服小象

空游安識魚非子入定渾忘我是誰擾擾久無真面目  
堂堂留得老頭皮老頭皮三字見侯鯖錄形骸相索方之外意象  
分明某在斯拂拭衣塵求止泊卻從畫裏證深思

再題潤卿僧服小象

標季尙商戰兵有不厭詐設覆罔市利易幟弋時價鹽  
腦夢亦搏含沙影能射百出其詭險戰略吁可怕秦君  
起孤根赤立無憑藉手提節制師周旋殊整暇但爲不  
可勝彌縫到漏罅要示晉文信不雜宋襄霸一正敵萬  
譎平心絕機獲坐使疑戰徒偃旂退三舍吾鄉久不振  
閭閻漸凋謝秋冬蕭颯氣期君作春夏再接再厲乃仔  
肩不容卸胡爲遁僧服對之生怪訝前途莽空闊努力  
策高駕吾詩有鼓聲爲君壯叱咤

冬夜明存過談



杯盤羅列雜莖醃隱約深談月轉檐酒味恰如人意苦  
霜花暗與夜寒添心期太密翻多忤涕笑相看總不嫌  
華屋山邱同一瞥底須蹙蹙惜沈淹

慰明存

世路艱難不可行況堪歲事逼崢嶸浮名已逐黃金盡  
苦語能令白髮生妙畫雙龍飛破壁異書百雉失專城  
車闐馬咽原無味且與窮交聽雪聲

次韻君木

張美翊

酒未新篘菜待醃荒荒寒日漏疏檐不知漢臘年來  
改但覺秦灰劫後添避世偏於賢者近離羣終爲俗

人嫌繩牀老病顏唐甚夢幻無端豈久淹

壯歲浮槎海外行當年氣象獨崢嶸平時權略消磨  
盡易代心情感慨生喜有文章論法派媿無詩句撼  
長城我如病葉君孤幹風雪天寒尙作聲

贈范賁虎用去年與幼度酬唱韻

不是相尋便枉存槃談往往徹朝昏胸羅幽怪稽神錄  
室有兄丁父乙尊出世衣冠殊落落照人肝膽尙言言  
狂生自取安心法底用黃金塞墓門賁虎好僧服

除日與范賁虎董貞柯世楨同過明存家居時明  
存眷屬留滯上海

回風堂詩卷六  
六  
揣汝端居念益深提攜二子一追尋蒼茫家室成孤寄  
愁苦詩篇有好音衰世人情徒負負空堂暮色尙沈沈  
歲寒寂莫同相守稍慰平生結客心

爲范賁虎壽李皋字甲子

吾友李君絕等倫意量坦坦惟其真讀書不成去而賈  
遂有奇氣騰風塵卅年挾術走淮海所至輒與其人親  
賢豪長者坐常滿門前車馬何隱鱗散財結客苦不足  
願以貨殖資單貧千金寧但濟緩急一諾時用排糾紛  
氣勢敵國古劇孟聲名驚坐今陳遵布衣之俠不世出  
如君磊落真天民頭顱種種忽五十已聞結屋江之濱



海天浩蕩不歸去奈何老作他鄉人  
青青山色橫蛟門  
有室可處田可耘  
半生奔走良苦辛  
政須妥帖寧心神  
繫我與君爲弟昆  
兩世交好情彌敦  
君爲始滿我過五  
少日歡笑應重溫  
歸來歸來勿延佇  
安排花木開酒尊  
與君爛醉三千春

耳病自遣

世間暫時偶有我但以旦夕圖安便是何  
鬼物據我耳  
一病數月無由痊  
玄黃龍戰起奧窔  
地小那足容回旋  
連雞勢成苦滋蔓  
腦海煜煜騰烽烟  
合眼靜坐每自攝  
萬響颯沓來無邊  
西風怒號簫笛竅  
微雨忽灑箏琵琶

平生體物擅長技而此奇祕難窮宣他人不聞我獨預  
矜寵付與寧非天由來絲竹不如肉妙音在耳誰能傳  
眼前不死亦佳事從容獨笑終殘年

蹇叟次韻見示疊韻奉報

我輩畢生役文字禦人口給常便便心思漸涸百病出  
雖有藥石寧能痊支離房闥日復日我我久厭相周旋  
乞靈無奈到司命心香飄作春空烟山阿窈窕路險絕  
靈之來兮雲無邊陰陽乍乍通真宰迎送旦旦歌神絃  
求生不得但祈死鬱悶亦足資排宣陽和剝極會當復  
深黑中有清明天爾我此舉太奇詭詩人故實應流傳

神靈有無漫執著各用心力支殘年

再疊韻答賁虎

病夫體質久已敝猶有筆力逞輕便心靈旦夕苟不死  
千疋百疾行當痊平生鬱鬱抱孤峭寸腸詰屈難迴旋  
刁調淩紙發噫氣墨花怒涌黃山烟故人范叔苦念我  
強以戒律聒耳邊歐心唾地徒自伐琴之適也須忘絃  
我謂君言殊不然五音六律常相宣中央七竅鑿既破  
那能重返渾沌天絨滕局鐫固閉距養生薪火非真傳  
啍啍此意爲君謝卮言曼衍聊窮年

玄嬰兩次韻見慰目余爲聾三疊前韻報之



玄嬰詩思玄之玄  
俛詩脫口恣佞便  
斯人斯疾強周內

一怒或使沈疴痊

暗用文摯齊閔事

我生病耳亦已久  
頭目併

作輪輿旋六通  
四闢發奇響如鬼  
嘯雨狂啼烟子其  
聾

我甚矣悖誕詞  
河漢嘻無邊荒唐  
一往致諧謔故故  
誤

拂箏上絃虛名  
諡我太無賴巧用  
言語資號宣一再  
相

聒苦不舍煩冤  
欲訴蒼蒼天我不  
贖贖爾贖贖呻吟  
頃

刻成訛傳呼牛  
呼馬應曰諾且與  
同登耳順年

劉夢得和樂天

耳順吟詩吟君新什慰蹉跎屈指同登耳順科

### 次韻酬佛矢

餘生枯槁不如前  
濕沫响濡肯見憐  
筆落能爲獅子吼

技窮剛值鼠兒年卜居久厭人間世呵壁愁看牖底天  
會得逍遙方外旨今宵準擬作佳眠

爲上海嚴氏題三世耄耄圖

海上有嚴氏其家多壽人晚得佳孫子寫圖存其真藹  
然八十翁有子八十一有子又有孫八二歲方畢二百  
四三齡僅以三人分易世必加壽得一已足珍溫溫祖  
妣氏齊眉亦三世有盈而無旻添籌循定例終古壽者  
相現之憑丹青木公與金母重叠輝雙星昔在唐宋世  
尙齒留佳話九老或五老流傳到圖畫異姓已不易何  
況一姓合一姓已不易何況三世接三世已不易何況

盡偕老偕老已不易何況增壽考譬若登山然一峯高一峯又如行遠路進步無回蹤三世六壽人迭衍壽迭上四五六七世將來壽可想先家既昭著後券殆預操壽是君家物吾語非徒豪

毛生無止起游學美利堅贈之以扇並題二絕

男兒要具四方志底用臨歧惜別離老夫自有無窮意莫忘涼風入抱時

毛生學力日日進老夫白髮日日多他日歸來同驗取大家歲月不蹉跎

甲子秋日感事



紅羊浩劫有循環六十年來物力還似怪東南太寥寂  
要將血色著江山

安忍由來必阻兵傷憐何暇到民生彌天礮火如雷起  
不抵將軍鼻息聲

感事

決絕吟成感白頭朝雲暮雨遍滄洲佳人齊子工傾國  
少婦盧家號莫愁穆穆金波驚夜鵲迢迢銀漢待牽牛  
吳淞半幅誰能翦多恐河中水不流

阮郎歸去已無家誰爲新儂弄琵琶十丈輦紅開步障  
六萌油碧走香車情人桃葉歌迎接大道長安有狹斜

楊柳千條盡西向只愁啼損馬塍花

飛鳴佻巧仗雄鳩密約何勞問蹇修含睇山阿宜窈窕  
揚靈江水暫夷猶疏風帖帖侵三面新月纖纖盼兩頭  
十萬聘錢盈手贈儘堪跨鳳作遨遊

小姑居處本無郎療妒翻尋海外方坐使枯魚過河泣  
願爲李樹代桃僵不關漆室思君苦祇笑瑤光奪壻忙  
玉貌黃門渾俊絕可堪花縣失河陽

抱蔓歸來涕泗沱黃臺四摘奈瓜何大隄星火行人少  
小渚烟霜落雁多步道不通船道絕南山有鳥北山羅  
裴回三路無消息腸斷人間讀曲歌

次韻徐仲可招飲寓齋

海髮山膚雜上盤送窮無計且消寒天涯短景成高會  
歲晏清尊得小歡墮地葉聲和雪聽浮爐烟色當雲看  
寂寥況味勞相慰珍重隆冬此授餐

寓齋小集賦呈馮君木朱炎父 徐 珂

客中嘉會託杯盤寂莫相期保歲寒如此江山是何  
世無多光景暫爲歡浮雲祇覺名心淡殘雪須憑冷  
眼看中澤噉鴻方待哺莫嫌草具且加餐

歲暮寄稚望次陳器伯韻

誰令憔悴客京華念汝天涯發歎嗟乾谷巨魚難潤沫



窮途黃犬亦磨牙  
聲名稍喜依廚顧  
詞賦由來困勒差  
政使飢寒堪卒歲  
江南萬口已無家

時蘇常間  
戰事正烈

除夕讀稚望自京來書感賦

陳道量

眼中久已薄紛華  
逐食春明絕可嗟  
長簡危詞發悽  
愴少年朝氣失  
槎牙空憐彈鋏歌  
無濟應悟傭書計  
已差雨雪烽烟作  
除夕知君獨客倍思家

回風堂詩卷六

回風堂詩卷七

慈谿馮并君木

挽趙菊椒家蕃 乙丑

堂堂趙六兄氣概世無兩肝膽如玉雪颯爽照天壤結  
客散黃金海外有聲響棄官走滬瀆落拓朋儕駟商風  
忽不競礫礫喪其帑西湖好山色排愁且獨往埋頭烟  
水中尊酒託疏放黎渦妙解事旖旎消骯髒君胡不自  
喜寂莫謝塵埃回首於菟門虎氣夜猶朗

君葬處曰  
於菟門

憶昔一首寄楊石蠶

我昔十二齡君生才九歲戚屬有牽連意氣合童稚翦

紙爲傀儡放學恣嬉戲捉筆施眉目自夸負絕藝塗成  
方相面君見輒心悸有時聚諸兒列坐作都試我爲主  
試官君文每落第怫然掉首去交頤紛涕泗餌以果若  
餅歡喜不復恚轉眄四十載愴怳如隔世我衰君亦艾  
念之發悲歎曩者始見君綠衣綰雙髻曾是玉雪兒蜩  
毛繞口鼻兒女各長大刺眼生憎畏此輩促我老欲避  
苦無計流光若渣滓咀嚼有何味歲月落吾手尺寸皆  
浪費小時都了了至今了不異文章難療飢口腹坐爲  
累平生數成就所得是頽廢寥寥天壤間忽忽懔相對  
浮生能幾何且結有涯契



題趙叔雍尊嶽高梧軒圖

塵居苦塊莽討幽到人外風軒納遠空大坐得清快亭  
亭梧之樹離立互向背參天見直性蕭然宜默對蘿薜  
紛在眼茲意無人會畫圖發高致山阿竚含睇

朱漚尹侍郎孝臧屬題吳缶廬畫彊村校詞圖

侍郎窈窕人淵衿納遠思餘事及聲律叩心發深摯字  
縣入太宵疏燈耿無睡下上苦求索旁皇到一字深深  
抉內撻力欲洩其祕鶴聲出匱飛彌天鼓清吹小雅久  
曠絕赤手造風氣缶翁老好事畫筆見殊致蕭寥水石  
外人間此何世夢中校夢龕惝恍在天際定有古衣冠

呻吟通寤寐

侍郎與王半塘同校夢窗詞半塘署所居曰校夢龕

### 贈李雲書部郎

吁嗟李翁天之徒豐頤和懌脩幹軀便便腰腹五石瓠

中氣內蘊神益都龍嵒高屋翁所居門外轍跡闢大途

所居誦清堂路翁自闢

道周樹色青扶疏曠絕不異畏壘虛入門

徑滑不可趨文石碎作魚鱗鋪頗黎雪白暎室廬室中

四壁羅畫圖以手捫之發歎吁父兮母兮今則無年五

六十稱藐孤哀哀不得忘勞勛

室中懸太翁太夫人影象四壁殆滿

春秋

佳日開齋廚別出手法傳膳奴刻畫菽乳雕筍蔬徑欲

唐突雞魚豬坐有老饕多文儒大談劇辯聲響麤翁發

一語姑徐徐四坐絕倒紛胡盧英英兒子元愷如有子十六  
人脩然翠竹間碧梧諸孫爛漫皆俊雛珠明玉暖圍牀  
敷翁顧而笑懽有餘端居篤耆毗尼書心神莽眇游物  
初處身塊若櫟株拘甲子一周真須臾來歲孟陬百彙  
蘇辰良吉日穆將愉父庚女乙陳雙觚壽堂佳氣充廣  
除吾言質實非導諛彌年壽考翁其胡

陳藍洲先生畫卷其叔子叔通太史敬弟屬題

丈人具勝情畫事出簡貴稍稍著淡墨遂有陂陀意微  
覺造境清彈指發春氣筆底紅梅花破空作暉麗芳香  
所醞藉拔奇高澹外回望舊時月翠尊照寤寐展卷忽



神往髣髴見深致黃落西湖山到眼成隔世清塵遺爪  
甲風味故不隊歲晏風蕭蕭篝燈憺相對矢詩報次公  
念舊送嗟喟

除夕與于相守歲

一年日月滔滔過何事低回惜此宵轉眼黃昏成白曉  
驚心來歲卽明朝商量詩卷資排遣打點杯盤共寂寥  
我自蹉跎君亦老寒燈相守只無憀

題賀西凌師章僧服小象

丙寅

意在無人曉心於何處安烟香花影外四海一蒲團

周公延

覃

過留齋中前夕章叔言方一宿去賦贈

一律

昨宵榻爲章生下猶喜今朝汝肯來款語更番資涕笑  
老懷竟夕與低回爐頭藥火微微斂窗下燈花旋旋開  
神思闌珊吾病矣苦吟對子不能才

久病畏風范文甫迎致其家槃桓竟日感賦

春深慙辦須臾樂病久渾忘出入愁曲牖周遮防漏吹  
幽房蹀躞當清游石山小樹連盆合簫局溫香著硯浮  
感子殷勤排遣意可能隻手解天囚文甫善醫

吳缶老倉碩爲余畫菊賦詩報謝卽效其體

落英餐罷日之夕迸汨繁霜寫百憂盡去鉛華成偃蹇

窮搜意象得風流自然放筆爲直幹豈曰此花非我秋  
滿眼衆芳多萎絕義熙佳色在枝頭

彊邨先生以飲水詞暨荔支見餉賦詩報謝

俊詞與佳果風味皆可口左持右手把不異螯若酒飽  
啖三百顆徹讀三百首

飲水詞都三百七闕

減偷散北吁香色詫

南有唾拾太真餘身仰重光後甘津崖蜜消哀響壑冰  
叩感公出膏馥沾勻到庸朽但愁腸胃濁清氣不堪受  
陳詩報嘉況祇覺言之醜

望雨

決眼入天際空勞望雨心片雲如片玉一瞥作輕陰



苦旱

但有日相炙都無雲可期蒼天枯欲死后土溼何時澤  
竭魚應泣原焦稻不支眼中成旱象準備忍調飢

壽朱彊邨先生七十

彊邨老益彊昭質完不虧晞髮陽之阿皇問時乎時颯  
沓庚子秋直言動京師蛾眉雖見嫉姱節荃察之無術  
回小劫退而逃于詞刁調發噫氣人籟資天才世運俄  
翻覆伊鬱抒深悲西頽憂白日誓以心力支纏綿忍惜  
誦婉篤增抽思匪謂事無益而遣生有涯澧蘭與沅芷  
到今流芳菲大哉張楚力端賴靈均辭詞人有忠愛縣

絕恆干斯靳公保長命永永無絕衰

風雨竟日入夜雨勢益惡

朝來方喜雨有喜忽而憂榱棟如將壓階庭欲上浮飄  
搖連日夕頽靡念波流長夜何時旦瀟瀟徹九幽

十一月初四夕夢與錢仲濟同舟泛海遙望海天  
廓寥有絳雲自天末冉冉上雲中隱約見樓閣其  
色若琥珀仲濟告余此無涯亭也醒而賦詩記之  
絳雲一抹際天橫天末飛亭入眼明攬取無涯好光景  
不須重憶有涯生

賀西凌招同劉未林鳳起袁伯夔思亮陳天嬰畏

壘兄弟沙孟海洪太完完會飲寓齋次未林韻

一檠軍聲動海濱歲寒清讌集流人亂離此日足可惜  
凋耗吾生太不辰姑托楮觴消慘沮深愁兵火結冬春  
片時作適須珍重莫遣餘酣委路塵

仲可築室上海康家橋寫康居圖屬題

莫遂逃虛願栖栖安所之畫圖勞鑿空蹤跡託居夷豈  
謂圖鵬徙聊堪從鳳嬉比隣有詞客妍唱博深悲與夏  
劍丞爲隣

吳缶翁姚虞琴招飲晨風廬次缶翁韻

堆肉成陵阜排川給酒漿花情舒婉嬾詩態釋矜莊作



健從林類逃名老務光海濱流浪士魂夢亦湯湯  
颯沓悲羣動瞢騰避百魔夜遊良有以日飲更亡何憂  
思支殘臘酣顏博小酌慰飢勞裹飯感激等滹沱

病足兩月吳缶老以詩見慰時缶老亦有同病  
不爲迷陽歎路窮吾行卻曲將毋同會須索我形骸外  
甚欲相尋寂莫中擲埴何心聽塗說步虛無術御天風  
籃輿莫逐門生後只覺先零愧是翁

除日雜書

彌天四海盡張羅奈此羣黎懞懞何同谷羌邨無地避  
却來都市聽夷歌

兵甲聲中白日徂行子不敢鼓龍胡縱然燭火輝闌夜  
只覺淒涼滿大塗

白粲如珠祇忍飢成行蓼菜亦居奇禦冬無力營菹蓄  
卒歲寧當食肉糜

萬方黔首一拘攣愁怨如潮汨海壖來日大難空束手  
欲將何物作新年

次缶老韻卽效缶體

丁卯

一身不保況室家知我如此生原差同根煎迫箕然豆  
著力舂揄米變沙蹋破三千年重器吹殘十八拍胡笳  
缶翁何不日鼓缶莫復邱中問麥麻

題洪太完岷夢圖

思母不見心骨痛卒無如何求諸夢夢境歷歷母在斯  
夢醒儻忽又失之留夢不得奈何許寫作畫圖寄悽苦  
五磊山色青寥寥其下有屋如團焦靈之來今倘無誤  
此是孤兒揮泪處孤兒念母無已時母來撫兒兒豈知  
須臾不離有魂魄一昔見夢但其迹青山不隔慈顏愁  
谷響如聞母噢咻畫邪夢邪姑不問終古劬勞在方寸  
聞吳缶老游超山賦詩寄之

超山梅花天下奇芳春去矣翁來遲幾番吹罷梅邊笛  
月色猶應似宋時



鄣吳回首有餘哀，垂老何心問劫灰。  
無限蕭寥遺世意，了知不爲看山來。

游法蘭西公園感賦

草色清空浮地起，林陰積疊當山依。  
水風一片來人外，解爲蠻姬吹薄衣。

曲折晴沙徑路深，池亭布置入幽沈。  
爭墩一念微茫動，累我尋秋獨往心。

同彊邨先生游憩法蘭西公園

深深樹色隱寥天，假息須臾亦灑然。  
可惜春秋非我屬，不知魏晉是何年。  
摩肩茗坐依空水，聒耳夷歌接亂蟬。

風景雖殊聊取暢未須結感到林泉

送陳季屏祥翰北遊

北方學者望君久何事夷猶君不行豈爲兵戈阻游跡  
可能邱壑老浮生江南無地容伸脚日下能文夙著名  
結襪匆匆圖遠嫁非關直北是神京

吳缶老屬題中年所畫山水冊

缶翁畫筆直不枉空世所有作莽蒼煙邪雲邪出指掌  
垂老猶堪資供養中年意氣邈一放落墨匪求世流賞  
自將刻削窮遠勢合眼谿巒神獨往今是何世不可問  
山中無人多魑罔逝塵拾得增累唏一角殘山照天壤

題余雲岫巖小影

峨峨若干丈松朗朗如百間屋試參腸胃文章莫問形骸土木

有語勝多多許無能不鏤鏤新名下故多虛士眼中忽見此人

丁卯除夕吳醜簪爲余寫逃空圖卽以隋董美人誌搨本索題先賦一律報之

佳趣惓惓得未曾空中彈指作崢嶸闌宵燈火歲云盡高處蒼茫寒不勝促迫留真君獨肯呻吟自病客無能美人緣法纏綿甚奈此填胸一段冰



次均湖帆題逃空圖戊辰

儘從惆悵得高奇如見含毫獨往時  
索取微茫真意思不須更讀畫中詩

戊辰新歲次未林太史韻

未免有情誰復遣此間得趣少彌佳  
天寒空色黯如積人定雪聲清到懷  
冷抱自嫌生使獨高歌差喜作能偕  
春韶幾許需追琢茲事猶當仗我儕

挽吳缶老

人生若行道雖脩有必達耄期得懸解  
死矣遂弗活夫子天下好最物等魯兀  
往虛俄實歸沾漑及庸末萬手

扳其命堅牢不可脫毒哉板板天一夕奪之猝湛湛文  
字海波浪何清闊珠光儵歿斂終古黑無月

羣陰蔽下上六合黯不曉藏身海市底坐與世紛了孤  
憤難自雪矢詩逞奇矯餘事及書畫光氣出指爪點墨  
落天壤人間詫瓊寶逃名真匪易跼門地無草過從念  
誰昔揖我謂我好證癖到微尙適若枵得飽交期胡短  
短相識恨不早而我猶爲人何術起此老

爲徐伯熊題小影

徐君藹藹今長者六十之年顏未衰脩然置身水石外  
豐頤廣顙含光輝垂手兀立如有望紙上跳出雙雙兒

是二兒者名阿誰全憑畫師意匠爲左右踴躍聊取快  
惟君用意吾能知知君抱孫尙有待嬰琬玉雪常榮思  
冀從幻想獲真實作圖之意蓋速之長松肅穆生微颺  
松身迸作鱗之而一索再索兆在斯含飴會許資娛嬉  
怪君底事童其頤甯防小手弄胡髭

贈余百之

自我交百之性命得所託鬼伯促我去君輒以手格凝  
神發天秘兼覩及裏褱提絜其神明使我氣不索譬彼  
俠者徒努力扶孱弱餘生資保障積感彌寥廓

十年游海外絕學得津逮妙明新手眼別有西來意盡



屏五行說靈素可坐廢匪云古是虐要識時爲帝國工  
撫舊律斷斷持同異吾舌幸尙存力欲關其喙著書見  
微尙跼脚到實地古有養生論縹渺在雲氣

旁通及蒼雅撰述有根據畫梅遣餘力稱此開美度解  
衣般礪羸拗筆用其怒花若破空飛幹若著地鑄填胸  
百悱惻悉索供一吐風香播指肘小道澤雅故夫君豈  
天授方寸羅衆疇

療貧苦無術張貼姑鬻醫十治九輒已收效日以奇自  
朝至日盱形役忘困疲耳徵兼目諗篤實爲不欺或憫  
其無告一念動於慈受酬有弗忍翻以藥資之青蚨稍

稍集動爲義故施盈簾不得障飛散靡孑遺毋曰源混  
混其奈流澌澌歲計恆不足貧也猶昔時九秋月幾望  
是君誕降期提身符道要五十甯云衰何以致殷勤爲  
君陳小詩醴醴甘說士吾口非偏肥

哭金小圃

北鑾

憔悴金夫子餘生亦大難身從桃竹杖手裂惠文冠  
宦況成三宿危言豈一端海濱歌哭地與我共荒寒  
聞病驚相看剛逢屬續時呼君終不應知我復爲誰  
但有憑棺慟猶思轉塵悲青楊門巷近可許夢攀追

題箕裘願學後圖爲丁子裘

後火續前火藏熱彌隔世檐頭滴滴水不離咫尺地懋  
哉孝子心繼述及志事畢生道無改茲願端非細耿耿  
明發懷清芬通寤寐誦詩述祖德過庭有成例箕裘紹  
弓冶孝思永不匱舉足躡故迹敢云躬未逮精誠積方  
寸掬泪付幽續穆穆我父祖洋洋悅相對

湖上雜詩己巳

頗哀老子得游遨扶杖將車賴汝曹來日西湖好山色

可能償我一宵勞

攜沙生孟海兒子貞用附  
夜行車抵杭是夕宿旅館

咫尺湖光入坐妍清談好好致纏緜比隣槐柳朱門裏

知有何人數屋椽

天嬰居湖上比鄰有某要  
人門外車馬終日不絕



倒景浮圖失望中盡將湖水作空濛  
悵悵一片斜陽色猶在雷峯缺處紅

綠堤車馬日磷磷占取園林酬苦辛  
試向翠微亭下望騎驢躑躅又何人

別業林亭屢變更沿谿沙礫浩縱橫  
殷勤勞汝烹佳茗未必在山泉水清

徐生公起貽余佳茗

照眼疏髯信軼倫湖濱一揖倍相親  
臨流皴面君應識須鬣依然不貸人

遇項蘭生不相見者二十年矣

月泉微尚託吟呻賴有湖山慰隱淪  
我屋公墩盡摧廓

祇愁無地著詩人

范儼文朱眉仙過訪范方與其鄉人立詩社

良金范象孤山陞手掬寒泉一薦之忽憶小樓燈皎皎  
茗甌清對夜闌時孤山瞻吳缶廬遺象

物外形骸吾喪我鏡中顏色子爲誰如何阿堵傳神處

到眼翻成火不思

與天嬰次布孟海秋陽公起仲回攝景冷泉亭景成黯澹無復神采攝工

復以濃墨點睛益不類矣戲題二絕其上

珍重臨流一瞥餘當風衣帶忽凌虛通靈毫髮都飛去  
邱壑可從置幼輿

老來腰脚未衰孱十里烟巒任往還猶有勝情堪濟勝

不勞拄頰看西山

泊舟赤山步與天嬰次布探歷石屋烟霞水樂諸洞抵暮乃還

仙樂琤琤以水鳴洞天石氣逼人清澹游政恐時流覺

疥壁何煩記姓名

游南山水樂洞洞外石壁陡削有以題名刻石請者書此示之

爲曹靖陶熙宇

題看雲樓覓句圖

家國惓惓日欲曛  
彌天四海起兵氛  
高樓下瞰人間世  
一片崢嶸盡赤雲

不須天際問輕陰  
非霧非烟太鬱深  
一望蓬蓬遠春外  
都收蒼慘入詩心

題魏伯楨炯五十小象

伯楨權奇士肯爲世故牽  
讀書兼讀律執操彌清堅  
宦途何犖确去去裳屢褰  
有銜不得祛忽屈知非年  
留貌作五十形影資周旋  
歷歷追往迹飄若空中烟  
保持真



面目自視胡顰焉看天瞠不眴如有所思然君豈忘世  
者知君心拳拳

董樂山大圻六十壽詩

憶余生七歲方當就傅期藹藹王先生實爲童子師諸  
兒多跳盪背師作戲嬉余弱不好弄坐是遭陵欺同學  
有董君諸童受指麾見余孱弗忍往往翼護之忽忽五  
十載歷歷猶堪思君今已六十我年亦將耆低回幼稚  
事那不白其髭君擅寫真術落筆窮深微幾許世人面  
鉤勒靡遁遺時光難倒挽容顏或可追胡不攝舊跡貌  
取兒童姿盡掩衰醜態玉雪充皮肌抹搯少壯老還我

上學時返老縱無術此亦延年資以此互娛晚驩喜長  
無涯握管發奇想爲君陳俛詩

湖樓感賦次天嬰均

任使湖山萬卉零紛紅駭綠徧林亭惱人燈火彌天沸  
如鬼車聲帶夢聽百計銷金渾不解一生蓄眼未曾經  
清涼辦取須臾適坐倚高空看曉星

次韻天嬰秋感

遮眼湖山黯不開幔亭高會祇增哀俊流爭逐青蠅集  
游女齊歌赤鳳來酒罷天容如共醉却餘江色亦成灰  
武林舊事吾能說南渡而還第幾回

次均寄天嬰

排危無計慙偷安壯不如人老更難晏歲生涯隨水縮  
窮居門戶比雲單漫從天末追殘照但覺城中增暮寒  
等是枯魚相啗濡年來溼沫亦都乾

得于相書並示君誨見贈之作次韻奉寄兼貽君  
誨

來日難于上水船口號聊與致纏緜恢奇已分愁中盡  
文字猶從澹處傳才語悲辛休取厭京塵粥飯且隨緣  
過江山色青如昨只恐清寒勝往年

程子大頌藩將圖西歸久未成行賦詩留之



風水夷猶君不行倦游歸計尙難成上流如覺浪將至  
下渚已無田可耕布韞青鞵徒自苦廢池喬木厭言兵  
武昌魚好知何味且喫江南玉糝羹

聽王介籥賢彈琴

憂患填膺有不平且將琴語託孤清五絃如聽哀鴻唳  
十指能爲大蟹行慘澹形神窮曠感蒼涼天海接秋聲  
宮商變後遺音絕莫遣成連識此情

次均天嬰見寄

一世瞢騰裏何人解忌才高歌姑自聖憤念亦成灰風  
急飄啼遠兵嚴戒夢來初暘餘瓦甓誰遣守空臺

天嬰

居近葛嶺

題董仰甫喬年春艸廬遺詩

空廬草色有餘清  
換世誰知昔日情  
不忍家山問耆舊  
每從詩卷接平生  
淺深所就皆高致  
前後相聞是緩聲  
宛變傷時無盡意  
苦吟端不爲浮名

己巳十月歸甬上三宿別宥齋留贈朱贊父

慰勞兼妻子  
高情比鹿門  
淡深參薄感  
心妥得微溫  
瓶菊堪娛夕  
籠鸚亦解言  
餘生江海上  
不忘此黃昏

題吳缶老畫蘭

缶老以丁卯十一月六日卒是幀爲三日前所

畫翊旦卽中風不能語蓋最後之絕筆也蒼勁  
鬱律意氣橫出豈非莊周所謂神全者邪次君  
東邁屬題遂賦一律

衰腕猶能百屈申自濡禿筆挽餘春芬芳后土吾將老  
窈窕山阿若有人出手花光增惝怳歐心詩句雜悲辛  
繚繚神理應無盡乞與湘纍作後身

次高雲麓

振霄韻

蹋葉曾相訪門清無雜賓石樓凌木杪沙路接江濤酒  
罷留微感詩成索解人桃源花落盡何意惜餘春

微尙存哀郢空文厭美新有涯餘短日未死亦陳人閱



世銷悲喜逃虛絕想因迷陽多卻曲莫復轉方輪

題陳巨來夷同安持精舍圖卽送其出關次金香

嚴韻

巨來有印癖百石填諸胸與汝安心竟手眼非橫通網  
羅盤孟書收攝南北宗尋絲入瀉孔雕棘慙其工小心  
期大受操刀理或同持志氣勿暴此才可治中舉世尙  
刻核物論須研窮印外有事在努力追符充

嚴慧鋒燮母丁夫人七十壽詩

爲母殷殷乞小詩眼中嚴燮是孤兒衰年作健甯閑養  
苦境回思轉益悲可但承懽償積瘁要憑努力答深慈

變乎兄弟須交勉莫忘劬勞在莒時

題項易庵自寫小象爲蔣穀孫

象用墨山水用朱上有自題二律云  
牘水殘山色尙朱天昏地黑影微軀赤心  
燄起塗丹牘渴筆言輕媿畫圖人物寥寥誰可貌  
谷雲杳杳亦如愚翻然自嘆三招隱孰信狂夫早與俱  
一貌清癯色自黧全憑赭粉映須眉因慙人面多容  
飾別染燕支豈好奇久爲傷時神漸減未經哭  
帝氣先垂啼痕雖拭憂如在日望昇平想欲癡  
後題崇禎甲申四月聞京師三月十九日之變

悲憤成疾旣甦乃寫墨容補以朱畫情見乎詩  
以紀歲月江南在野臣項聖謨時年四十有八  
傍有郭鼎默李肇亨題詩不備錄

夜半負山去奪取苦無計但憑指肘力留此尺寸毫  
毛何茂茂歐心濡血淚厓壁蔚丹紅草樹發光氣我朱  
方孔陽舍此身焉置殊山賸水間朗雲照寤寐

美人風箏限咸韻

婀娜凌虛似轉帆留仙誰爲捉裙衫上昇弄玉堪偕隱  
小字飛瓊果不凡碧落微吟迴電笑玉清下謫怨天讒  
九霄風色無憑準莫向雲門奏大咸



同作

洪曰湄

絕迹飛行信不凡封姨相送試輕衫仙裙縹緲臨風  
舉妝鏡玲瓏對月嵌墜後綠珠身媚媚牽來紅線手  
摻摻翩然莫逞驚鴻態若木天東要挂縿

才思

庚午

才思銷沉盡奚由遣不平逃虛成獨往臨老惜深情髮  
齒凋憂患乾坤任毀成民勞兼寇虐定定汔今生

九月六日亡室俞孺人誕辰追薦蕭寺戊阿拜雲  
皆至拜雲有詩贈戊阿卽次其均

虛堂梵吹徹丁東感逝難勝況病中廿載呻吟慙緩死

九徂魂夢阻幽通  
爐香旋旋飄煙直  
幃燭幢幢閣泪紅  
慢聽酒徒飛笑語  
底須心動問幡風

程子大以中泠泉見餉兼媵一詩賦此報謝

萬古中泠水不乾  
一甌酌我勝加餐  
相濡可但分啣沫  
下咽真能洗肺肝  
病後稍紓司馬渴  
詩成恰稱溧陽寒  
夜闌點茗生虛想  
浮玉玲瓏盃底看

啣況于切據  
莊子音義

子大以新刻鹿川詩集見示卽題其後疊前均

波瀾古井未曾乾  
橡栗空山不素餐  
自靖猶能紀喪亂  
窮思真欲歐心肝  
海隅風動鵲啼急  
湘上霜清鶴語寒  
晞髮年年今老矣  
長留詩卷與人看

汝身

汝身非汝有斯疾困斯人居士真成木蒼天信不仁揮毫悲卻曲借箸亦艱辛材與不材外吾今作幸民

个篋奉王一老所寫先德遺象索題

辛未

王生老人今畫師意匠慘淡誰知之卅載音塵通寤寐底須眉目證孤兒

平生見似目猶瞿天地無情泪欲枯茗碗香爐資供養不知能慰母心無

謹案先君於庚午十二月忽病右手痿痹侵尋遂及全身自知危疾在躬匪易獲瘳太息低回形諸吟詠



汝身一律詞特淒婉蓋有由也易歲而後病勢轉亟  
一家憂惶都難爲計先君猶能屬思構文曲相寬譬  
卷末二絕卽於困頓中口占令貞胥書者時體氣大  
損言語蹇澀扶頭蹙額神情頽然貞胥珥筆侍旁傷  
心萬狀制泪飾貌五內若摧孤兒歲月勿勿兩棋顧  
瞻陳迹如寢如酣哀哀之思如何可言民國二十二  
年癸酉八月孤貞胥錄稿畢泣識

YORK UNIVERSITY

JUL 03 2001

EAST ASIAN STUDIES

回風堂詩卷七

回風堂詩卷七









